

**Ane' Karavotonane'
JEEMISIE
Daarivuu'nane'
Kara Baavootunanka
Ane'kooning**

1:1 Parapaarananka Kune'ampira Kumponing-koo Ima'mariri Tampa' O'noriaina'

1:19 Nii'ke Kumponing-koo Aroo'marimainge Nantoong Tampa' Nkoarampiaing

5:7 Purimariri Kunsimariaing Oving Toroar-avaina'mung Nempampima

**Parapaarananka Kune'ampira
Kumponing-koo Ima'mariri
Tampa' O'noriaina'**

(1:1-18)

¹ Aung ane' karavoto~ ninge Jeemisie daariamang tee Kumponing ee'noko tee Jiisuu' Karistoo'daang beekaang botovotonaake. Tampa' tampamang dii'koo kivora-ita kenaanka muu' Isireeli-nupoong-koo avitoitoi purarenka'dariri otorimaing-koo.

*Parapaarai Baito Purimarimaung
Noru'ampima Keekoo'mariauka'*

² Ee mmaikori', ni'ninka nari' Jiisuu'koo baitorarimaing, doturoturariri otorimaatoaing tenang kapoo' avutevu' parapaarananka kune'erima.

³ Ai' dii'ke tee noru'eri otong tenang diikaang masika'anta teie parapaarai paararuriko tee, da'deng apukaruu'kiria' otorimaatoai.

⁴ Ee'noko tee' pinka'dariri otorikotaa' koonto' ima'dariai Kumponing bakaang pia narung tanpa' siomperima ookusii'eri, nii'noo' siperia'.

Naning Matau-koo Apuka'parara Deeko' Kunsiaravaing

⁵ Dii'koo naning narung matau-koo apuka'parara tee Kumponing nia'uaing, tee ookara nantoong-koo avusiro', domang manki'oa', ee'noko teie avuaing tee.

⁶ Teka tee baito ninka eentavaravaing noru' keekoo'arava', ai' tee keekoo'aramaung tee tee-pina' boo'a dovinge avitoitoi bereravumaung.

⁷⁻⁸ Teie naninge ee' noru'uai: Naning noru' kenaankai tee kapoo' nkavuarupeu' Ororing-eta, bakaang aarumo ookara naro'ke pinka'aravaung deemparako.

Tautau Aa'ning-koo Kapoo'koo Apuka'parimaing Ee'noko Manearimaing

⁹ Teing ata'oinku nii'maikorori' teing dotuariai Kumponinge deto kompurimaung-koo.

¹⁰ Ee'noko teing nantoong mmau'po'nupoong tee dotuariai Kumponinge doonko otoromanoo' tasi'antavuru'nung-koo, ai' teing tee-pina' kaakaa' napo' namu'ke boomaung.

¹¹ Duaa' tee uipaarii' naapu ninka daa'aramaung ee'noko baa'nanka mara'antavukoo', napo' kaakaa'nanka dua'arikoo' ee'noko tanpa' oro'noo' tenang paa'arakoo'. Tee' nari' napo' teing nantoong

mmau' kavo-po'nupoong paa'ariaing teing
biikaning nko-nkonanka nkoaamaing.

*Kumponinge Nii' Tampa' Nkomurimaung,
Oraka' Nko-koo Baramuriaung*

¹² Biraanke-nupoong teing nantoong para-
paaranankai apukaruu'antavuriaung-koo, ai'
te'mung ookara parapaarananka puru'aara teing
tee biikaang moo' nkasiiavaing, tee domang-
anta Kumponinge maraka-antavuru'nung teing-
koo tee pankaruntoompaamaing-koo.

¹³ Tenang naninge parapaara kune'uma
tosiarama aa'puauka', "Kumponinge orara nko-
koo paaramumaang," ai' naninge Kumponing
orara nko-koo paaravuarupeu' ee'noko teie baka
naning tee' paaravuarupeu'.

¹⁴ Teka tee nantoonge kantena' parapaara
kune'aako teie biikaang karaa' orarai narunge
teing tosivurima barampurikoo' orara aarumo
nko-koo.

¹⁵ Teka tee karaa' domang-koo nare'ukotaa'
oraka'nko basi-antavuu'naang, ee'noko teketa
otokotaa' orara aarumo panka'parara boo'
basiaraa'naang.

¹⁶ Ee mmaikori' piaarampimaing, tarerariai
dii'ka tosirarima nii'na' noru'eri'neeng, ai'
Kumponing tee orara nko-koo paaramuriaung.

¹⁷ Ookara kapoo' paning-eta pomaing teing tam-
peng naing, ee'noko ookara avuavu'nanka tam-
peng masakeng teing Kumponinge nii'koo de-
peto po'antavumaing tee Ookara Araka Okonara
deempario'. Tee aampari'arava' araka narung
naumurimaung. Mutaanameng tee-koo otoa'.

¹⁸ Teie nii' baurukaa' deeng-antamuru' bakaang kara masikung taara-antamurira. Baka piavora tee' nkomuru' nii' tutuna'nupoong o'norii'naang ookara bakaning nkovuru'nanka-koo.

Nii'ke Kumponing-koo Aroo'marimainge Nantoong Tampa' Nkoarampiaing

(1:19-5:6)

Kara Taaravampira Meumpampiaing

¹⁹ Ee mmaikori' piaarampimaing, tee aung noru'eriaing: Ookara naruna' naruna' namu'ke kara taaraverimaatoai, teka maku'koo ee'noko iira-koo iri'naruntaria' otoai,

²⁰ ai' naning bakaang iirai aarumo koonto' Kumponing bakaang narung tavo'antavuaung.

²¹ Tee'koo teing aing aa'ning enang siperiai: aarumo ku'mi' ee'noko domang orarai maanto'ui oto'; ee'noko tee kara Kumponing bakaang dii'koo keempuko baroromperira aroo'eriai, tee tenaarei dii' domang-anta-koo makosinaare.

²² Tee kara tamung taaraverima tosirariauka', teka taaraverima nkoverimatoai.

²³⁻²⁴ Ai' dii'ke ampa'dori siomperiaung deeko' dii' teing tee-pina' naning bakaang oing oorara-koo oorama tenkenura namu'ke ampa'opeu' bakaang oing oro'oro'na'.

²⁵ Teko tee Kumponing bakaang kara koonto' unaa-anta-koong, ee'noko baa tee naning tee kara kuung oovumatoaing kapoo' nauvumaung nko-koo ampa'oa', teie tee bakaang nko-nko-koo kunge biraanke nkavuaing.

²⁶ Naning dootuu'nung tamparama bakaang karang makosina' minkuvuaung tee, bakaang domang tosi-antavarapeu' ee'noko bakaang dootuu' daange.

²⁷ Tee dootuu'koong aarumo kiiroraa' masikung ee'noko pituaravaung Niuma Kumponing-koo uro'kanoo'ke tee aung: Naning maantuaara' ee'noko teing naaroonku beero'urima pakuvurimatoai ee'noko naning baka tanatavari otoai kansi' bakaang aarumo orari-antavu'neeng-koo.

2

Amutemurii'koo Tampa' Nari' Nkoarampima Si-ivenke'meeriauka'

¹ Ee mmaikori', niikaang Ovoring Jiisuu' tee ee'nara urikamu'keta Kumponinge Pako'pari'nii' domamurira taremuriainoo'koong, tee daurarong~ meenasi okora'. Tee' masika'antaveri otori nantoong daunaro' oovererima siivenke'ereria' otoriaing.

² Aa'noko deeko', naning tampa' nepunepu'nii' diing tovang kooro-kooning kurunii' dootuu'nava-koo kuung poko, napo' naning ata'oi' nari' porepeu' te', mononopa' dere' kurunii'.

³ Ee'noko tenaanka-koo tee tampa' nepunepu'nii'koo doororaripeu' ee'noko mooni' mmou' dua'upeu'na' noru'erima aa'peripeu', "Pinau, aa' pora tampa' ba'naniai," tee ata'oi' aa'perima, "A, duuku'darava' basi ba'naniai."

4 Tee' nkoverima nantoong tankaamperima makotua'na' simpe' nkonuka~ deeng-antararimaung daang matau oraka' siomperi siivenke'ererima.

5 Ee mmaikori', taarameriai, nantoong kansi'nupoonge ata'oi'nuka tampaarimaing bii'ka duuku'nuka deea', ai' Kumponing teing miru'uru'nung tee-koo aa'na' baito-nii'nuka otoroo'naang ee'noko tee'koo bakaang muu' okovuriaing tee' maraka-antavuru'na' teing-koo tee pankaruntoompaamaing-koo.

6 Teka dii'ke tamunsi'nupoong tamperererikoo' teing ata'oi'nuka. Teka io' noru'eriai, teing mmaw' kavopo'nupoong teing iki'antaraarimaing ee'noko diikaang komaaru~ namu'ke maku'eriaruko tuutunang~koo donkong-antaraarikoo'.

7 Ee'noko Jiisuu' bakaang miring pankaing akapeu'aakoo', tee miring dii' biraanker-ariru'nung.

8 Daari Meekung-koo narung boto pankaing otong aa'pumaung,

“Dake tee naning da'koo due'nung daka piaararamana' nari' tee' piaaveaing.” *(Boontu 19:18)*

Tee tenaare makosina' dupe-antaverira deeko' tampa'.

9 Teka siivenke' nkoveriaing deeko' tee dii' oraka' nkoraririning ee'noko teie botoi tompinturi otong tee toto'perining deentariko.

10 Ai' baa tee naning ootukunung boto tampa' siompuma nii'navu' toto'pura deeko' teie tee ootukunung boto naro'ka toto'puinung.

11 Tee ee'pina', Kumponing bakaang boto-koo nampeesi orarieauka'naare nanaare minkuvua', napo' naning tavema dupisi'eauka'naare minkuvuu'. Teka dake teing-koo aa'nopeu' nampeesi orariea' naning tavema dupisi'epeu', tee'koo da' tee boto toto' deentaring.

12 Dii' teing Karistoo' bakaang boto-koo kuunge unaarori otorimaing, tee'koo tampa' karerima unaa-antareerimatoaing, ai' dii' teing teie botoi Karistoo' bakaange simpe'ruriaining.

13 Kumponing tee piaavuria' kiimatavuriaing teing nantoong piaa oro'antavaavauka'ning. Teka piaa oro'antavaako deeko' teie napo' piaavurira baari'antavuriaing kiimata-ita.

Baito Nko-nko Ninkaing

14 Ee mmaikori', naninge aa'pui dei, “Ning masika'anta oto'memung,” teka nko-nko otoa', tee-koong sinang aming? Temurii' masika'antai ee domang-antavupeu'?

15-16 Nii'noo' naning narung Karistoo'koo nii'maiko' aa'ning-koo apuka'parako duaana-koo ee'noko taamang-koo, ee'noko dii'koo narunge tamung aa'pupeu' tee, “Pinau, bera duaannararavai ee'noko pooruai,” teka kapoo' avua' tee mono-nameng-koo apuka'pari otoining-koo, tee-koo aming basiarapeu'?

17 Tee'koo tee masika'anta nko-nko oto'evuaung tee boo'.

18 Naninge aa'muko “Tamung masika'antavanko Kumponing domang-antamuaing,” ninge aa'pampeu', “Aia' io' dakaang masika'anta nko-nkoropa baito masikung deeko'

naumeai, ee'noko ninge nkaang masika'anta naurampai nkaang nko-nko-koo sira'pario'."

¹⁹ Dake tamung masika'antavei aa'pemaung, "Kumponing tee narung," teka temurii' masika'anta makosi deea'. Teinge ma'narie tee' nari' masika'antavai otorong, ee'noko Kumponing meumeevanuka tasi'pariri dankusi'kaamaunge kera'pariaina' noru'ai.

²⁰ Da' tee naning masika'anta-koo daunaa'anta oto'derung arekee', nau-antarama'naang piaromaang tee temurii' masika'anta manta'paravaung tamung sinangropa?

²¹ Noru'ea' ee tee niuma Eebaraami' nko-nko-koo Kumponing naning koonto' tampuu'nung tenang tee bauring Aisake' boontunampuu'naang nkoaru'nang?

²² Ooveko teie nko-nkoi masika'anta dupe-antavura makosi-antavuu'.

²³ Tee' meumpuio' tee Daari Meekung-koong kara dupearu' aa'pumaung,

"Eebaraami'ke Kumponing masika'antavuiio' Kumponing naning koonto' tampuu'."
(Pupu' 15:6)

Ee'noko tee Kumponing bakaang navumai tam-pari otomaung.

²⁴ Ooveko, naning tee nko-nko ninka nari' masika'antavuko deeko' Kumponing naning koonto' tampupeu', masika'anta narung-koo deea'.

²⁵ Ee'noko napo' teni Reeapi, orani, tee' nari'ke, nko-nko ninka nari' masika'antavui tenaanka Kumponing bakanaanka botovotonaa'ka bokuvureta napo' beekaning kare-nupoong-

koo koono-antavuresi mo'minge sivuresio'
Kumponinge koonto'nani tampuu'.

²⁶ To'biiario' aa'pamaang, tee' nari' tee mono do-
maangropa tee boo' tee-pina' masika'anta tee'ke,
nko-nkoropa tee boo'.

3

Karang Tampa' Taremariaing

¹ Ee mmaikori', nantoong mmau' nau-
antananka deeng-antarariauka', ai' dii'ke tee
noru'eri otong nii' nau-antanuka teing deepo'
simpe'muriaining.

² Nii'ke ookarai amutemurii'ke
bekoi'ampimaung kara sikuri'ke minkuampima,
ee'noko naninge karoma kapoo' orara
minkuvuauka'nung deeko' tee tee naning koonto'
masikung, bakaang mono ootukunung tampa'
tarearamaung.

³ Napo' tevororo' oosinavoro' deeko', nii'ke
aini oki'navu' karang-koo dusi'ampiko
tevororo'koo koinampira tee ootukunavoro' nii'
piamorimana' nanukoo' tevu' beeto'ampima
botoampipeu'nairue.

⁴ Napo' aarerinanka~ ooveriai, aa'na'
pankenanka, piong purinto'ke bii'urimaing,
teing tee'ke, oki'navento'koo boo'e-navento'koo
kaputeninukai koong-antavaario' nanaamaunge
piavoromanoo'ke.

⁵ Napo' meneng tee'ke, tee oki'naa kapoo',
teka kapoo' pankeng nkovuma daangampara-
peu'. Pora' pankaing tee oki'namo'keta nta'ke
taivumaung.

⁶ Tee meneng teie nta'ke. Kapoo' orarai maanto' mono-koo meu'ke otomaung. Teke otoi toko-ita doompeto ookara mono orari-antavukoo' paro'uma mosianung okora'ario'.

⁷ Ookara kapoo'nanka amutemurii' kau' kare-naumo ee'noko barennanka napo' kakanaamaunanka ee'noko pirung-koonanka teing data-antakoo makosi; data-antavaarimaung nantoonge.

⁸ Teka naning otoa' meneng data-antavupeu'nung, tee dooroompari oto' deeaung, orara, ee'noko boo'kooninge doparopai maanto'ke.

⁹ Teie narunge menenge nii'ke Kumponing tee Niuma tampara tampampimaung ee'noko napo' teie narunge menenge nantoong barakosi'arampikoo', teing Kumponing-pina' oro'antavuri nkovuru'ning.

¹⁰ Teka tee narung karang-eta tampa' minkuampikoo'; napo' barakosi' minkuampikoo'. Ee mmaikori', tee' makosina' deea'.

¹¹ Arekee' tee pu'anta, dinkung narinkung-eta ntong tarii' ee'noko ntong tokaa' naro'ke bakoarepeu'?

¹² Arekee', mmaikori', tuare-navari-koo ee mou-koong sinang bi'upeu'? Napo' mo'ming-naving-koo ee bia-namoni' teke bi'upeu'? Makotua'. Napo' pirung-eta ntong tarii' nke'koo makosi deea'.

Mataumariri O'noriaing Boonko Noru'mariri Nantoong Pakuarampima

¹³ Baa naning matau ee'noko norukasi' dii'koo? Makosi, tampa' otoi tee bakaang matau

oro'antavuaing matauna' dooroompari tampa' nkovuma.

¹⁴ Teka diikaang domang-koo mamairo ee'noko pankaing-pina' noru' otoko deeko', dii' mataupo'nupoong-pina' daangantarima kara masikung daka'periauka'.

¹⁵ Tee' oro' noru'nanka teing paning-eta poa', teka teing aing kansi'kooning noru'; Tanuaang Meekung-etaning deea', Sietani'ketaning.

¹⁶ Ai' are' tokoo mamairo, baka-noru', ee'noko pankaing-pina' noru' oro'paravainoo'ke teke turang otong ee'noko amutemurii' oraka'nko otong.

¹⁷ Teka tee temurii' noru' matau paning-etaing tutuna' tee pituari oto' deeaung, teketa mooa-anta, banainge oto', noru' barorompari oto', pi-aae maanto', ee'noko nii'ning sinang tampeng, siivenke'ari noru' otoaruko, ampirinung dovang nari'.

¹⁸ Ee'noko teinge mooa nkonukai tee mooa-koong sinang keempaakotaa' tee koompari oto' sinang kavaavaing.

4

Kansi'koong Aarumo Piamoriauka' Ororing-koo Turanii'nuka O'nori'neenga

¹ Aminankai tee tata' dovang turanturang, kare tavo'antavumaung dii'koo meu'ke? Tee aa' tee teinge diikaning karaa'ke naruna' naruna' domang manki'antaruriko kare basiarumaung.

² Dii'ke karaa'erimaing nka-koo makosiriaruma nii'ning mamairorarima dupisi'erererimaung. Napo' dii'ke nii'ning oto'evoromaing kong-koo kevi'erima tavu' tutumperimaung

pari'ererii'naang teing. Teka dii'ke nkaveriaung aa'noma: nii'nang Kumponing-koo eentarari-aruma.

³ Ee'noko nii'nang bane nia'eriko Kumponinge aruriaung tamung karakaraa'koo oto'derurii'naang piarorimaung-koo, Kumponing dotu-antana' noru'eriaruma.

⁴ Dii' bakei nampeesi orariaamaing-pina' makosinuka, ai' dii'ke Kumponing bakaning miru'nii'nukai kansi' bakaang aarumo karaa'erima Kumponing ninka aa'na' munte'nupoong deeng-antararimaung. Ee', baa tee naning kansi'aapening piaavuaing tee baka Kumponing ninka turani' deemparing.

⁵ Arekee' noru'erimang? Daari Meekunge ee daang minkuvuu' aa'puma,
 “Tee Tanuaang Meekung Kumponinge nii'koo otoo'naang amuru'nunge tee nii' karaa'muri pia-antamurimaung Kumponing-koo narung-koo aroo'mariri o'norii'naang.”?

⁶ Ee'noko Kumponinge tee' tampa' nkomurima teie napo' piaamuri bakanavung siong-koo pakumurimaung bakaning tampa' nkonanka-koo dau pau'ui. Tee'koo Daari Meekunge aa'pumaung,
 “Kumponinge turampurimaung teing baka daanganuka, ee'noko piaavuri pakuvurikoo' teing boonko noru'ariri otoromaing.” *(Mirumiru' 3:34)*

⁷ Tee'koo Kumponing-koo boonko otori tee Si-etani' turamperimatoai dii'ankoita mmaruaina'.

⁸ Kumponing-koo due'antarariai ee'noko tee Kumponing due'aravai dii'koo. Dii'

oraka' nkorarimaing bere'darira tampa' nari' nkorarimatoaing, ee'noko dii' tunsi paakanuka noru' narung deentariri domang kiiroraa'po'nupoong otorimaatoai.

⁹ Orarunsirarima birontarimatoai diikaang oraka' nkonanka tasi'perima. Teing-koo benkeng siperi maia'doriai. Doturotu siperima napo' mi'miinkirorimatoai.

¹⁰ Ee'noko Oving-koo tee' amaiaa'doriko teie deto i'anturiai.

Oraka' Minkumeeriauka'

¹¹ Ee mmaikori', dii'ka oraka' minkureeria' otoai. Baa tee naning ba'maiko' oraka' minkuvuma simpe'umaunge tee boto oraka' minkuvuma simpe'umaung. Teka dake tee boto simpe'eaing deeko' da' boto siong deea', da' makotua'na' boto simpe' deeng-antararamang.

¹² Nii' narung daurarong~ boto amuri-maung oto'memuring, ee'noko teie deeko' simpe'muriaing. Napo' teie deeko' makosi nantoong domang-anta-koo nii'noo' orari-anta-koo. Ai' da' Kumponing-pina' basi noru'darama ee tee' simpe'erimaunge nantoong?

Nii'ka Daangamariauka'

¹³ Arerai da' aa'pemaatomaung, "E'mung nii'noo' tane' deeko' temono-ita temono-koo mee'naang ee'noko namare' teke o'noai baavenang-koo mooni' barampama."

¹⁴ Dake aa' tane' noru'ea' dakaang otooto'koo otoaina', ai' da' tee tee-pina' kamo' batei oki'namu'koo oro'parama namu'ke paa'aramaung-pina'.

15 Teka dake aa'pei dei makosi, “Ovoring bakaang pia-koo deeko' nii' domamariri aunanka nkoarampiaing.”

16 Teka dii' ee' nkorarimaung, miring pankain-tarima daangantarimaung. Tee tee' oro' baka daangang tee orara.

17 Tee'koo tee naning aarumo koonto' noru'ui, teka nkovua' otong, tee tee oraka' nkoaramang.

5

Kavo Mmau'po'nupoonge Moo' Orara Nkavaavaina'

1 Enang ooveriko dii' kavo mmau'po'nupoong, enang bairarima birontariaing arikananka kune'eriaining-koo.

2 Ookara kapoo' diikaning teing dera'oroaining ee'noko diikaning mononopa'nanka pumpu'ke ta-iaavaininge.

3 Ee'noko diikaang koro ee'noko siliva'nanka takarau'oroaing, ee'noko teie takarau'noo'ke tee diikaang mosii' sira'duriko tora'kiriaing nta'ke kate'during-pina'. Dii'ke tamung oosierimaung-koo teinankai tuumpiruriaing asi'na'mung Ovoringe simpe' nkovuko.

4 Ooveriko, teing dii'koo mintoomparimaing mintoong daaka'deraariko tosiererima moo' pinka'evurererikoo', ee'noko tee ee'nara mooni' baku'erimaung Ovoring Iirakuta-koo punkang-koo biromparamang, teing kavu'nupoong biikaang birovirong ninka.

5 Ee'noko dii' teing nantoong koonto'nuka tuutunampererima dupisi'ererererimaing bii'ka avo'avo'daariaruko;

⁶ Anke kansi'koo otoritaa' tee dii' ookara kapoo'nanka piarorimaing oto'derurimaung, ee'noko teing-koo doturarima otorikoo' Ovinge tuutunanturima mosianung-aape botoruriaina'mung nemperi, pooro' pina' tamung doreng-antavarima te'mung domang tampe'aariaina'mung nempaamana'.

Purimariri Kunsimariaing Oving Toroaravaina'mung Nempampima

(5:7-20)

Manki' Puru'ampiri Purimariai Oving Nempampima

⁷ Tee'koo, ee mmaikori', teinge tee' oraka' nko-raariko mii'kiri otoriai poaina'mung nemperi. Ooverimang tee naning mintoong bauko sinang petaa'oainoo' nempui ka'duuaru otomaung tee taamang tampara kansi'keta nkavuaina'mung noru'ui. Tutuntoma-ita bera o'domai basi tampa' tarevumaung.

⁸ Dii' tee'ke, ima'dariri ka'duurariri otorimaa-toai, ai' Oving poaina'mung tee doong due'uing.

⁹ Minkuminkureeria' otoai, ee mmaikori', tu-umpiruri'neenga. Ooveriko, tee Simpe'nko~ tee karanaang-koo donkonui otong.

¹⁰ Ee mmaikori', teing urikupoong nakaropung~ io' oovereriaing, tee Oving bakaang miring ninka kareaako'ning. Teinge arikung kune'aama ka'duuariri otoroko'na' tampa' tasi'perira siomperiaing.

¹¹ Enang noru'ereriaing, teing turampaariko domang tampa' nari' otoroko'ning biraankenuka

tamparampimaing. Narung tee Jop, bakaang domang maamuari otoko'na' taaraverimaunge amutemurii' manki'anta ninka, ee'noko tee' Ovinge tampa' botu basi-antavuu'na' tasi'peri otong. Teie Ovinge nii' napo' tee' nkomurimaung piaae maanto' deemparitaa'.

Marakamariauka'

¹² Ee mmaikori', ookara-koo daua ee' noru'eriai, o'nori marakamaria' otoai paning-aape ee'noko kansi'aape nii'noo' nii'ning kapoo' tampampima, teka masikung deeko' tamung "ee" tamperiai, ee'noko masikung deeaung deeko' tamung "a" tamperiai, tuumpi kune'eri'neenga.

Naning Koompari Otomaung Bakaang Kungsi Tee Purinto'

¹³ Dii'koo nii'nung manki' kune'umaung deeko' kunsiaravaing. Napo' nii'nung domang kuaa'oi oto' otomaung deeko' Oving kenavuma daangampuaing.

¹⁴ Napo' dii'koo nii'nung siipavomaung deeko' dootuu'koo urantanuka-koo botoaravaing, ee'noko teinge tee kunsiaavaing duunie sisi'aama Oving bakaang miring-koo.

¹⁵ Ee'noko baitoariri kunsiariko Ovinge domampura deto i'ampuai tee. Ee'noko orara nkonko nkovuu'nung deeko' tonta'antavevuai.

¹⁶ Tee'koo diikaang oraka' nkonanka sirasira'darimatoai nii'ning dii'maikorori'koo. Ee'noko napo' kungsi-koo pakureerimaatoai taarevoroaina'. Ai' tee kungsi naning koonto' bakaang tee aa'na' purinto'po'nung kapoo' nkonko.

¹⁷ Eliasi tee naning tee' oro' nii'pina' bakaang aarumo, nii'na'mung tee aa'na' kungsiaru' apo'uaroo'naang beenaumo mare'koo bera ~nautaa kaara, ee'noko tee' nari' apo'uaruu' kansi'.

¹⁸ Teketa napo' dama'ke kungsiario' paning-eta apo' pou', ee'noko kansi'ke bakaning sinananka tavo'antavuru'.

Baa Tee Kumponing Bakanavung Sipupeu'nung Tee Napo' Bere'antavampiai

¹⁹ Ee mmaikori', dii'koo narung tampara aarumo sipui pooarako deeko', narunge koong-antavuaing tee.

²⁰ Noru'eriaing, baa tee naninge tee pooaru'nung koong-antavuaing teie tee bakaang tanuaang boo'parapeu'noo'keta domampung. Bakaning mmau' orananka tonta'aravaing deeng-antavuing.

Basi te'.

**Kara Naroong-anta Nerakung Kongarana'
The New Testament in the Naasioi Language of Papua
New Guinea**

Nupela Testamen long tokples Naasioi long Niugini

Copyright © 1994 The Bible Society of Papua New Guinea

© Faith Comes by Hearing

Language: Naasioi

Dialect: Kongara

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 18 Apr 2025 from source files dated 31 Aug 2023

0fe571ca-6209-55e0-bc3e-74b7123016b1